



01. oktober 2008

Inatsisartut suleriaasianni § 36, stk. 1 naapertorlugu matumuuna imaattumik Naalakkersuisunut apeqquteqassaanga:

Tassangaannartumik Nunarsuarmi ullunilu makkunani sukkaqisumik siuariartortumik aningaasarsiornikkut ajornartorsiulernerup kingunerisaanik pisut pillugit, imaattunik Naalakkersuisunut apeqqutissaqarpunga:

- Aningaasasat tigoriaannaat uninngasuutaasut aningaaserivinni imaluunnit taarsigassarsisitsisarfinni sorlarni aammalu suut inissiinermi tunngavigalugit inisseqqavaat?
- Aningaasaliisartut aammalu taarsigassarsisitsisarfiit sorliit Namminersornerullutik Oqartussat tamakkiisuumik ilaannakortumilluunniit isumaqatigiissuteqarfigalugit suleqatigivaat?
- Aningaasat qanoq amerlatigisut Namminersorullutik Oqartussat tigoriaannartut pigisaat pappialanut aningaasatut nalilikkanut (pantebrevit assigisaallu) ilimmaakkatut inissinneqarnikuuppat, kikkullu taakua ingerlaarnerat nioqqutigineqartarneralluunniit aquppaat?
- Naalakkersuisut nalunaarutigisinnaanerpaat, inuiaqatigiit pisortanillu aqunneqartut ingerlatseqatigiiffiit taarsigassarsisariaqalernermikkut taarsigassarsiniartarnernut pisussaaffigititaasut annertussuserisartagaat aammalu taamatut iliornikkut piumasaasartut suusarnersut qanorlu qularnavequsiisarnernut piumasaqaatit isikkoqartarneri? (Namminersornerullutik Oqartussat ingerlatseqatigiiffiit pigisaat sukumiisumik erseqqarissumillu Inatsisartut aningaasanut inatsisissaanni siunnersuummi nalunaarsarnikuuppat)
 - Namminersornerullutik Oqartussat maani Nunatsini aningaaseriveqarnikkut ingerlatsisut, assersuutigalugit GrønlandsBANKEN aamma Sparbank, aningaasat kaaviigaartinneranni qanoq attaveqarfigitigaat? Apeqqummut tassunga ilanngullugu aningaaseriviit taakku aningaasaqarniarnermikkut patajaassusiata inissisimaffia.
- Naalakkersuisut nalunaarutigisinnaanerpaat Nunatta, Namminersornerulluni Oqartussaanerup iluani, taarsigassarsiat qanoq katillutit amerlassuseqarneri, aammalu taarsigassarsiortortoqarsimassappat taakku akilersorsinnaanerinut tatiginassutsip upperineqarsinnaanera qulakkeerneqarsimanersoq, ingerlatsiviit susassaqarfigineqartut qularnaveequseeqqiffiginerisigut?

(Inatsisartunut ilaasortaq Kuupik Kleist, Inuit Ataqatigiit)

Tunngavilersuut

Tassangaannartumik Nunarsuarmi ullunilu makkunani sukkaqisumik siuariartortumik aningaasarsiornikkut ajornartorsiulernerup, Amerikami (USA) aningaasarsiorfissuit akornanni pisut aallaavigalugit kingunerisaanik pisut pillugit pissutissaqarpugut, Nunatsinni upalungaarsimasariaqarluta, aningaasaqarniarnitta innarlerneqarnissaa pingitsoortinniassallugu immitsinnut pisussaffilertariaqarluta.

Ukiunut 2009-mut ukiunullu missingersuusiorfiusunut tullernut Aningaasanut inatsisissami takuneqarsinnaapput pilersaarutit arlallit, nunanit allamiunit aningasaliiffiqineqarlutik piviusunngortinniarneqartut, Nunatta karsiata arlalitsnigut aningaasaliinermigut peqataaffigisinnaasai ilaatigullu peqataaffigisariaqagai. Taakkua saniatigut ingerlatseqatigiiffissuit nunanit allaneersut sukataarput nunatta pisuussutaanik misissuerusullutik, qularnanngitsumik nunatta annertuumik suliffissuaqarfiulernissaanik kinguneqartussamik.

Inuit Ataqatigiit pingaartippaat, piffissaq ungasinnerusoq isigalugu Nunatta aningaasarsiornikkut ineriartornissaa nunarsuarmioqatitta aningaasarsiornerata ineriartornera ilutigalugu Nunatta aningaasarsiornikkut ineriartortinneqarnera qulakkiissallugu. Taamaammat aningaasaqarniarnitta aammalu siunissami ineriartortitsinermut pilersaarutitut aningaasaaleeqataasinnaanitta uppersassaa qulakkeertariaqarparput aamma.

Taamatut apeqquteqarlunga neriuppunga, maleruaqqusaasut malillugit, ullut suliffiit qulit qaangertinnagit akissutisissallunga.